



mjesečni Bilten



juli -
avgust
2020.

omladinska mreža bosne i hercegovine

254-255

Dragi prijatelji/ce,

Predstavljamo vam **DVOBROJ (254-255)** mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u julu/avgustu.....	2
Planovi za septembar.....	8
Aktivnosti članova mreže.....	9
Saopštenja/informacije/donatori/pozivi.....	19

Uživajte u čitanju!

AKTIVNOSTI ORC/HCA U JULU i AVGUSTU 2020.

PRVI CAT ONLINE KVIZ



CAT Bosna i Hercegovina ponovo nagrađuje mlade! **Utorak, 21.07.2020. godine u 19:00h započeo je prvi CAT online kviz znanja.** Pitanja na kvizu bila su iz sfere opšteg znanja i omladinskog aktivizma. Prva tri mjesta osvojila su vrijedne nagrade, te im ovom prilikom želimo da čestitamo i najavimo još mnogo online kvizova i još mnogo super nagrada.

To su: 1. Mjesto – **MARTINA LARMA** (Sarajevo), 2. Mjesto – **SANIN BAŠIĆ** (Sarajevo), 3. Mjesto – **SELMIR SMAJIĆ** (Lukavac)

CAT – Bosna i Hercegovina


Tokom mjeseca jula i avgusta, nastavili smo sa našim redovnim aktivnostima u sklopu projekta „Građani protiv terorizma – CAT“. Naše mačke su nastavile da oduševljavaju javnost na društvenim mrežama, a ovog mjeseca se počinjemo sa novim aktivnostima kao što je aktivistički vlog, a uskoro počinjemo i sa snimanjem dokumentarnog filma, a digitalna akademija je već uveliko u toku. Ukoliko još uvijek ne pratite naše mačke – pozivamo vas da to učinite na:

[Facebook](#), [Web Portal](#), [Instagram](#) i [Youtube kanal](#).



WEBINAR – Boram Agencija

22. jula (srijeda) sa početkom u 10 sati održana je Webinar radionica u organizaciji BORAM agencije za UNDP, a uz finansiranje Vlade Švedske. Tema ovog Webinara bila je identifikacija problema i mogućih rješenja vezanih za potencijalno infektivni otpad sa ostvrtom na COVID-19. Učešće na ovom Webinaru uzeli su stručnjaci iz raznih oblasti, kao što su: stručnjaci iz medicinske, stručnjaci za okoliš etc. Cilj ovog Webinara bio je u konačnici pronalazak efektivnog rješenja za ovu vrstu otpada i njegovog pravilnog odlaganja. Treba također napomenuti da su učešće na ovom Webinaru uzeli i članovi Omladinskog resursnog centra Tuzla. Ammar Grabić, Elda Lolić i Duško Majkić.



Sa mačkama u zajednici:

U Tuzli postoji Odbor za međureligijsku saradnju, koji je formiran prema inicijativi Međureligijskog vijeća u Bosni i Hercegovini. Među brojnim aktivnostima oni i oštro osuđuju sknavljenje vjerskih objekata i spomenika, te zajedno rade na promociji jedinstva, zajedništva i mira.



Članovi Odbora za međureligijsku saradnju su predstavnici svih konfesija, a kojim aktivnostima se mladi posvećuju, kao i koliko su religiozni, da li na našem prostoru ima religijskog radikalizma i da li politika zloupotrebljava vjeru odnosno religiju u Bosni i Hercegovini, neka su od pitanja na koje odgovaraju vjerski predstavnici u Tuzli.

Gostujući u programu RTV7 Tuzla kazali su da u Tuzli postoji visok stepen multikulturalnosti i interkulturalnosti, koja je po tome posebna u Bosni i Hercegovini.

Naši gosti su bili predstavnici tri najmnogoljudnije konfesije u BiH i u gradu Tuzli, islamske, katoličke i pravoslavne vjeroispovijesti, koji su kazali i da se osjećaju slobodno kao predstavnici svojih vjerskih zajednica i da mogu djelovati bez pritiska.

Naši gosti su bili Esmir efendija Hasanović koordinator za rad sa mladima pri Medžlisu Islamske zajednice Tuzla, fra Franjo Ninić župni vikar u Franjevačkom samostanu Tuzla i Miloš Trišić paroh tuzlanski. [VIDEO](#)

#CATPATROLA: Mašinci & Mirela Biković

Momci koji su spavali na kampusu na stolovima, igrali Soccer-a, tamo se hranili i živjeli, a sve to kako bi mi ostali mogli sigurno spavati u svojim domovima, bez rizika od zaraze.



Donosimo vam priču o, kako i sami kažu, ludim i hrabrim mladim ljudima koji su u vrijeme najveće krize #COVID-19 stali na prve linije i svojim nesebičnim zalaganjem spasili veliki broj doktora, policajaca, studenata i još mnogih drugih.

Trećoj epizodi CATPatrole Mirelini gosti bili su upravo članovi Studentskog vijeća Mašinskog fakulteta u Tuzli i asistent na Mašinskom fakultetu Denis Bećirović! [VIDEO](#)

PR(a)VO LICE AKTIVIZMA & ELDA LOLIĆ: #HerojiGeneracije

Najbolji od najboljih! U novoj epizodi PR(a)VOG lica aktivizma, Elda Lolić je razgovarala sa pobjednicima Radio Kameleon-ovog Big Bang Challengea. Oni su tu za bolje sutra! Atmosfera je bila na nivou, tako da pripremite zvučnike za najglasniji vlog do sada. [VIDEO](#)



ZAVRŠEN DRUGI MODUL PRVE CAT DIGITALNE AKADEMIJE

U saradnji sa eminentnim omladinskim radnicama iz Srbije - Ivanom Volf i Marinelom Šumanski donosimo našu **prvu Digitalnu akademiju za menadžere društvenih mreža!**



Završen je drugi modul naše prve CAT Digitalne akademija, te su povodom toga Ivana i Marinela sa nama podijelile svoje utiske i šta je urađeno sa učesnicima.

Šta je urađeno sa učesnicima na drugom modulu?

“Tokom drugog modula bavili smo se značajem online kampanja, njihovim pozitivnim i negativnim stranama, sa posebnim akcentom na kampanje koje se bave važnim društvenim temama.

Učesnici/ce su, zatim, imali zadatak da analiziraju neke od poznatih online kampanja koje su sprovodile ili još uvek sprovode druge organizacije civilnog društva, institucije ili društveni pokreti. U malim grupama, odgovarali su na 5 najvažnijih pitanja – zašto?, šta?, ko?, kada? gdje? kako bi bolje razumeli strukturu kampanje, razloge za njeno sprovođenje, ciljeve, potrebne resurse i medije putem kojih se sprovode. Na ovaj način, učesnici/ce su se pripremili za osmišljavanje svojih kampanja, koje je počelo odmah nakon ovog modula.

U okviru 2. modula imali smo i jedan Zoom sastanak, na kome smo uradili refleksiju onoga što je naučeno do sada i kratku evaluaciju dosadašnjeg zajedničkog rada, kao i da najavimo neke naredne aktivnosti.” – kažu Ivana i Marinela.

TRENING „MAČKE U ZAJEDNICI“ – FOJNICA

CAT trening – Mačke u zajednici je održan u Fojnici od 16. - 21. augusta 2020. godine. Trening je održan u sklopu projekta CAT Bosna i Hercegovina, koji implementira Omladinski resursni centar Tuzla.



Ciljevi treninga bili su izgradnja tima i kreiranje uličnih kampanja za nove CAT lokalne timove iz Prijedora, Mostara i Bijeljine.

Trening su vodili Zoran Milošević i Emir Karamujić, omladinski radnici sa višegodišnjim iskustvom u pripremi i realizaciji trening programa za mlade, članovi SEEYN Pool of Experts.

Tokom trajanja treninga učesnicima je preporučeno da budu pažljivi i disciplinovani kada je u pitanju pridržavanje epidemioloških mjera. Organizatori su učesnicima podijelili maske i dezinfekcijska sredstva.

Trening je okupio 13 mladih, 10 članova centralnog CAT tima i 3 nova lokalna koordinatora i koordinatorice iz prethodno navedenih opština.

#CAT PATROLA – NIKOLA VUČIĆ & HARIS DEDOVIĆ

Novinar koji je zbog svojih stavova bio meta udara medija i javnosti u Bosni i Hercegovini! NikolaVučić novi je gost #CatPatrole! Zbog čega je Nikola bio meta brutalnih napada i prijetnji pogledajte u novoj epizodi #CatPatrole! Nekada najmlađi voditelj dnevnika na Federalnoj televiziji, danas uspješan novinar na N1 televiziji i autor emisije „Izvan okvira“. [\(VIDEO\)](#)



Haris Dedović urednik je magazina koji je prvi citiran van naše galaksije i koji je zapošljavao čak 74 dopisnika sa drugih planeta. Zvuči nevjerovatno? Ako pogledate #CatPatrolu do kraja, shvatit ćete da nije! #Sjašite [\(VIDEO\)](#)



SA MAČKAMA U ZAJEDNICI – RTV7 & CAT

Neke od tema o kojima smo govorili sa našim sagovornicima u emisiji koju RTV7 realizuje u saradnji sa Omladinskim resursnim centrom Tuzla bile su pojedinosti o načinu rada u novoj školskoj/akademskoj godini!

Bilo je riječi o načinu rada tokom pandemije u smislu održavanja online nastave, te otkrivamo prednosti i nedostatke provedenog načina rada.

Ugostili smo Elmira Tukića, šefa Odsjeka za obrazovanje i nauku u Ministarstvu obrazovanja i nauke Tuzlanskog kantona, profesora doktora Vesnu Bratovčić – prorektora za Međunarodnu univerzitetsku saradnju i Mirsudina Pačariza predsjednika Aktiva direktora osnovnih škola u Tuzli. [\(VIDEO\)](#)



U novoj emisiji “Sa mačkama u zajednici” koju RTV7 Tuzla relizuje u saradnji sa Omladinskim resursnim centrom Tuzla govorili smo o seksualno reproduktivnom zdravlju.

Razgovarali smo sa primarijus doktoricom Amrom Habibović, načelnicom Službe zdravstvene zaštite žena i trudnica Doma zdravlja Doktor Mustafa Šehović Tuzla i doktoricom medicinskih nauka Selmom Azabagić, specijalistom higijene u Zavodu za javno zdravstvo Tuzlanskog kantona i savjetnicom za HIV.

[\(VIDEO\)](#)



Elda Lolić & Pr(a)vo lice aktivizma - Srđan Petković

Kao i svi, aktivisti (i mi smo obični ljudi :')) dolaze do raznih prepreka. Međutim, čari aktivizma i neformalnog obrazovanja ništa ne može nadmašiti. Kako je to upoznati nove ljude, vidjeti drukčije kulture i steći nova znanja i vještine, pogledajte sami. SHL vam sve to omogućava! Vaše je samo da ponesete želju za napretkom i dobru energiju. Baš kao što je to uradio Srđan. Kroz razgovor o edukaciji i

nezaboravnim avanturama aktivizma, uspjeli smo se bolje upoznati i sa SHL-ovim ambasadorom!
[\(VIDEO\)](#)



REDOVNE AKTIVNOSTI ORC I HCA TUZLA

Tokom jula i avgusta radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA SEPTEMBAR 2020.

- Nastavak digitalne Akademije, u okviru novog ciklusa CAT – Građani protiv terorizma.
- snimanje TV emisija na RTV 7,
- snimanje dokumentarnog filma o Muftiji Kurtu,
- Nastavak redovnih aktivnosti u okviru ALF BiH, CAT BiH...
- Početak aktivnosti sa srednjoškolicima iz TK, u okviru projekta „Profesionalna orijentacija kroz pasoš kompetencija“, koji je podržan od Vlade Kraljevine Norveške, u okviru projekta „Stvaranje povoljnijeg okruženja za civilno društvo – EMBRACE“. U okviru toga ćemo na početku implementirati set obuka – treninga „Životne vještine i vještine zapošljavanja“ za 100 učenika u Tuzlanskom kantonu

AKTIVNOSTI ČLANICA OMLADINSKE MREŽE BiH



HO „PARTNER“ Banja Luka
Ul. Srđe Zlopogleđe 55, 78000 Banjaluka
Tel./fax: +387 51 250 730
E-mail: partner@teol.net
Web: www.hopartner.org

Realizacija projekta “Socijalnim uslugama do kvalitetnijeg života”

Humanitarna organizacija “Partner” Banjaluka, započela je realizaciju projekta “Socijalnim uslugama do kvalitetnijeg života”, čiji je generalni cilj unapređenje kvaliteta usluga pomoći u kući starim licima i personalne asistencije licima sa invaliditetom, kao preduslova njihovog kvalitetnijeg života.

HO “Partner” od 2007. godine, kroz partnerstvo sa JU “Centar za socijalni rad” Banjaluka pruža uslugu personalne asistencije osobama sa težim oblicima invaliditeta, a od 2013. godine, smo jedina organizacija na području Grada Banjaluka koja pruža usluge pomoći u kući starim licima. Usluge korisnicima pruža oko trideset njegovatelja/asistenata koji im pomažu u svim svakodnevnom aktivnostima (obavljanje lične higijene, oblačenje, priprema obroka, higijena stambenog prostora, nabavka namirnica i lijekova, pratnja na posao, doktoru i druge aktivnosti u skladu sa individualnim potrebama samih korisnika). Svakako, jedna od obaveza zaposlenih jeste i usavršavanje, te iz tog razloga nastojimo da organizujemo dodatne obuke za zaposlene.

Problem sa kojim se godinama suočavamo jeste taj što je cijena sata relativno mala, pa se nezaposlene osobe teško odlučuju za poslove koji se odnose na pomoć starima ili licima sa invaliditetom. U posljednje tri godine organizaciju je napustilo godišnje 5-6 radnika tako da je promjenjeno gotovo 50% radnika i primljeni su radnici koji nisu prošli obuku koju trebamo organizovati.

Kroz ovaj projekat želimo da obezbjedimo dodatnu obuku za radnike koji pružaju uslugu, promoviramo posao asistenata i njegovatelja i nađemo još radnika koji žele raditi ovaj posao.

Ciljna grupa projekta su pored trenutno angažovanih lica, osobe koje se budu javile na javni poziv da su zainteresovane za obavljanje poslova personalnog asistenta ili njegovatelja, kao i sami korisnici navedenih usluga.

Pored aktivnosti koje se odnose na organizovanje obuka za zaposlene i zainteresovane osobe za posao njegovatelja/asistenta, poseban segment biće posvećen medijskoj promociji projektnih aktivnosti.

Projekat “Socijalnim uslugama do kvalitetnijeg života” finansira Grad Banjaluka i trajaće do kraja 2020. godine.





OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice



Omladinska organizacija Svitac je nastavila sa svakodnevnim aktivnostima po redovnom rasporedu, prva grupa učesnika od 11:00-13:00 uzrasta od 4-7 godina, a druga grupa učesnika od 14:00-15:30 uzrasta 8+. Mlađi učesnici su radili kreativne i edukativne stvari na radionicama prilagođene uzrastu, uz pomoć lokalnih i međunarodnih volontera. Ovaj mjesec su radili: crtanje raznih životinja pomoću ruke i prstiju te spajanja slova – zmija, žirafa, dinosaurus, mačka i pas, priče, basne i pjesme o drugarstvu, lijepim stvarima koje nas okružuju, poštovanju roditelja i ljubavi među ljudima. Nastavili su vježbati abecedu; učili su i vježbali pisanje slova S, Š, T, U i riječi, koje počinju sa tim slovima, te su crtali pojmove koji počinju na određeno slovo. Na muzičkim radionicama su ponavljali pjesmicu „Medo i med“ i pjesmu o pčelicama. Ovaj mjesec smo

takođe radili i sigurnost u saobraćaju, a na radionicama engleskog jezika teme: školski pribor, dijelovi tijela, igračke i pet pojmova koji asociraju na ljeto. Kao i prethodnih mjeseci Svitac je u okviru redovnih aktivnosti intenzivno radio na temi higijena i posvetio joj posebnu pažnju. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. U toku mjeseca smo radili diskusije na temu izbori u BiH, nezaposlenost mladih, direktan uticaj politike na mlade, trenutna migrantska situacija u našoj zemlji, ali i problem izbjeglica u cijelom svijetu.

Koordinator radionica je bio Adin Midžić uz asistenciju lokalnih, Weltwärts i EVS/ESC međunarodnih volontera.



Radionice gitare

Učesnici su nastavili sa radionicama. Većina radionica održana je u Omladinskom centru uz poštovanje mjera i odredaba o sigurnosti aktivnosti koje se obavljaju u javnim ustanovama. Neke radionice su održane on-line kada je bilo potrebno i to na zahtjev roditelja. Učesnici su nastavili sa radom na gradivu iz prethodnog perioda.

Tokom avgusta su učesnici nastavili sa radom na gradivu iz prethodnog perioda, uvježbavajući etide i kompozicije F.Sora, D.Aguada, L.Brouwera, R.Dyensa, E.Pujola, J.S.Bacha, D.Bogdanovića, kao i popularne pjesme po njihovom izboru.

Radionice sambe

Učesnici su nastavili održavati aktivnosti u Omladinskom centru. Najviše vremena posvećeno je druženju uz zajedničko sviranje i podsjećanje na sopstvene kompozicije, aranžmane kao i na "poznatije" kompozicije (Samba Reggae, Funk itd..). Takođe, grupa je počela sa radom na novoj ideji radnog naziva: "Cold Train".

U avgustu su učesnici radionice počeli rad na novoj kompoziciji radnog naziva "Kiki Chanel" po prvi put uz upotrebu efekata na bas i električnoj gitari (distorzija i delay). U drugoj polovini mjeseca aktivnosti su se sastojale od priprema, pregleda i dijeljenja kratkih edukativnih video klipova na Facebook stranicu grupe. Video klipovi su u produkciji njemačko-francuske TV stanice ARTE. Tema: Istorija i video igre.

ECO – projekat

Sa Eco timom smo bili u redovnom kontaktu kroz društvene mreže. Ovaj mjesec tim je bio u mogućnosti da se konačno sastane i organizuje nekoliko radionica. Učesnici su razgovarali o budućim projektima i planirali građansku peticiju za sakupljanje potpisa, kako bi ukazali na jedan dio grada, koji se nalazi u samom centru i zatrpan je smećem. Na ovaj način Eco tim želi ukazati da vlast treba preuzeti odgovornost za ljepši i čistiji grad.


Javna okupljanja su u Brčko distriktu još uvijek zabranjena, pa smo projekat „Brčko – čist grad za sve“ i građansku peticiju, kojom želimo vlastima ukazati na dio grada u samom centru gdje se nalazi velika deponija smeća, morali pomjeriti za period kada će zajednički rad u grupama biti omogućen.

Međunarodni dan prijateljstva

Međunarodni dan prijateljstva proglašen je 2011. godine od strane UN-a imajući na umu viziju da prijateljstvo među ljudima, zemljama, kulturama i individualcima može stvoriti uslove mira i graditi mostove među zajednicama. Svjetski dan prijateljstva je inicijativa koju je UNESCO predstavio Generalnoj skupštini UN-a još 1997. godine, a koja je definisala kulturu mira kao niz vrijednosti, stavova i aktivnosti koje odbacuju sve vrste nasilja uz nastojanja da se spriječe mogući konflikti.

Omladinska organizacija Svitac je obilježila Međunarodni dan prijateljstva kroz kreativnu radionicu za učesnike uzrasta 4-7 i 15+ godina. U kreativnom dijelu smo pravili srce za najboljeg prijatelja i listu stvari koje nam kažu šta je to prijateljstvo. Na ovaj način smo poslali poruku o važnosti prijatelja u našem životu. Cilj aktivnosti bio je razviti sposobnost percipiranja, kreativnosti i mašte i njegovati prijateljski odnos.

Grupa uzrasta 15+ je imala mogućnost pogledati video o prijateljstvu, te nam poslati svoje fotografije sa najboljim prijateljem/prijateljicom.



Za septembar se planira nastavak svih aktivnosti Omladinske organizacije Svitac.

Institut za
razvoj mladih KULT



Ul. 4. Viteške brigade

34 – 36 BA, 71210 Ilidža, Sarajevo

Tel: +387 33 778 778.

Fax: +387 33 778 79

E-mail: kult@mladi.org, web:
www.mladi.org

Institut izdvojio 20.000 KM za inicijative mladih iz cijele BiH

U Bosni i Hercegovini žive mladi koji stiču znanja i vještine, a potom ih ulažu u razvoj svojih zajednica doprinoseći tako sebi, ali i drugim mladim ljudima i društvu u cjelini. Da još uvijek širom BiH postoje mladi spremni raditi i graditi bolju budućnost dokazuju polaznice i polaznici petnaeste generacije „Uči, Misli i Djeluj!“ obuke za omladinske liderice i lidere.



Ovi mladi će do kraja godine provoditi lokalne građanske inicijative u 10 različitih zajednica širom Bosne i Hercegovine, i to: Zenica, Ilijaš, Srebrenik, Kiseljak, Tuzla, Foča, Bihać, Cazin, Žepče i Ilidža. Podršku u tome pružit će im Institut za razvoj mladih KULT i Ambasada Kraljevine Švedske u Bosni i Hercegovini, koji su izdvojili 20.000 KM za realizaciju ovih ideja.

Emina Zolota iz Ilidže jedna je od polaznica obuke koja će dobiti finansijsku i mentorsku podršku od tima Instituta i zajedno sa svojim timom vršnjaka provodit će edukacije iz IT oblasti i kreirati „Sigurnu mapu općine Ilidža“.

Emina kroz svoju inicijativu želi razviti interaktivnu mapu koju će moći koristiti svi stanovnici, ali i turisti, a koja će prikazivati dijelove grada gdje se najčešće dešavaju kriminalne radnje, ali i napadi pasa lualica. Kako kaže, u saradnji sa Ministarstvom unutrašnjih poslova želi doprinijeti povećanoj sigurnosti svojih sugrađana. Kroz svoju inicijativu organizirat će i radionice osnova programiranja kako bi obučila svoje vršnjake, a potom će zajedno kreirati nešto što će koristiti cijeloj zajednici.

Pored „Sigurne mape općine Ilidža“, mladi UMiD-ovci provodit će inicijative u oblastima ljudskih prava, ekologije i građanskog aktivizma. Neke od inicijativa će pomoći mladima da unaprijede infrastrukturu za mlade u lokalnoj zajednici, jačaju kapacitete i grade vještine, dok će preostale graditi mostove između marginaliziranih skupina društva, promovirati važnost zdravog života i educirati mlade o funkcioniranju organa uprave u lokalnim zajednicama.

Prva generacija UmiD Kids uspješno završila obuku

Mališani, polaznici obuke UMiD Kids, na posljednja dva modula obrađivali su teme Ljtnja i kontrola, odnosno timski rad, čime su kompletirali svoju obuku.

Posljednji dan obuke svi polaznici/e dobili su certifikate za uspješno završenu obuku i tako zauvijek ostali neizbrisivi trag na obuku UMiD Kids, jer su prvi koji su je uspješno završili. Namjera je da se obuka nastavi i u narednim godinama i pruži mogućnost drugim mališanima da dožive iskustva i znanja kakva je imala prva generacija.



Ema je devetogodišnja djevojčica, koja je pohađala obuku prethodnih 6 mjeseci i izjavila je da bi voljela kada bi mogla i naredne godine pohađati istu obuku i da joj je žao jer se druženje i učenje s drugarima završilo.


Roditelji mališana su također bili prezadovoljni cijelim programom i pristupom trenerskog tima, koji nije gubio kontakt s djecom ni u vrijeme izolacije i održavali su module online.

Roditelji su posebno izrazili zahvalnost za brigu prema djeci, ali i za aktivnosti u koje su se i sami mogli uključiti.

Obuka UMiD Kids započela je 22. februara i sastojala se od 12 tematskih cjelina značajnih za cjelokupni razvoj ličnosti djeteta. Ciljna skupina bile su djevojčice i dječaci uzrasta od 8 do 10 godina iz svih općina Kantona Sarajevo. Njih 30 činilo je prvu generaciju UMiD Kids polaznika/ca.

UMiD Kids provodi Institut za razvoj mladih KULT uz podršku Ambasade Kraljevine Nizozemske u BiH.

Novih 80 inicijativa koje će doprinijeti izgradnji mira u BiH



U okviru USAID-ovog mirovnog projekta PRO-Budućnost dodijeljeno je 80 grantova za aktivnosti na izgradnji mira u vrijednosti od preko 400 hiljada KM. Korisnici grantova su općine i gradovi, crkve i vjerske zajednice, nevladine organizacije, neformalne grupe mladih i udruženja žrtava rata iz više od 40 lokalnih zajednica u BiH.

PRO-Budućnost svake godine dodjeljuje grantove za aktivnosti čija je svrha

izgradnja povjerenja, međureligijskog dijaloga i doprinos pomirenju između svih naroda i građana Bosne i Hercegovine što je i suština ovog projekta Američke agencije za međunarodni razvoj (USAID) koji provodi organizacija Catholic Relief Services (CRS) sa partnerima u 75 lokalnih zajednica.

Program malih grantova provode Institut za razvoj mladih KULT i CRS.

Kroz projekte koje podržava, PRO-Budućnost će ove godine osim u mirovnim kampovima, biti u školama, vrtićima, kinima i pozorištima, na sportskim terenima, te povezivati susjedne opštine i promovisati turizam i kulturnu baštinu naše zemlje.

Neke od najvećih kompanija u BiH saglasne za poštivanje ljudskih prava u poslovanju

Deset novih kompanija javno su izrazile podršku u poštivanju i unaprjeđenju ljudskih prava u poslovanju. U zgradi Uprave Konzuma BiH uručeno je 10 Povelja o poštivanju ljudskih prava u poslovanju nekim od najvećih kompanija u BiH: AS Holding, Inside by Ećo, Planet, Wagner automative, Centrotrans-Eurolines, Wood team, Konzum, drogerie markt DM, Zračna luka Mostar i GS-TMT Travnik.



Povelju o poštivanju ljudskih prava u poslovanju razvio je Institut za razvoj mladih KULT u saradnji s Udruženjem poslodavaca FBiH uz podršku Evropske Unije.

Generalni direktor kompanije Inside by Ećo kaže da njihova kompanija u svom poslovanju svakako poštuje sve lokalne i međunarodne propise i standarde i da nije bilo dvojbe oko usvajanja Povelje, kako bi i pismeno na jednom mjestu prihvatili sva pozitivna načela poslovanja.

Povelja se sastoji od 15 tačaka koje se tiču sprječavanja narušavanja ljudskih prava, uključivanja zainteresiranih strana radi uvažavanja njihovog glasa i potreba, opredijeljenosti za jednak odnos prema svima, očuvanja radnog okruženja, zabrane prinudnog rada i zabrane umiješanosti u trgovinu ljudima, prava na sistem komunikacije koji maksimalno štiti povjerljivost za sve prijave zaposlenih.

Inicijativa za izradu i usvajanje Povelje o poštivanju ljudskih prava u poslovanju nastala je na bazi vodećih principa Ujedinjenih nacija i prvi je korak ka kreiranju državnog akcionog plana o poštivanju ljudskih prava u poslovnom sektoru. Prije izrade same Povelje, Institut je proveo istraživanje kako bi uvidjeli koliko su kompanije uopće svjesne važnosti poštivanja ljudskih prava. Rezultati istraživanja pokazuju da kompanije, posebno male, nisu bile svjesne da i one svojim poslovanjem mogu ugroziti ljudska prava.

Direktor Udruženja poslodavaca FBiH, gosp. Mladen Pandurević izjavio je da je usvajanje ovakvih povelja pozitivna praksa, koja će se nastaviti i u budućnosti i da pored 10 pristunih kompanija do sada je još 30-tak drugih članica Udruženja usvojilo i prihvatilo načela Povelje u svom poslovanju.

Kompletan tekst Povelje dostupan je na linku: www.mladi.org/myURL/povelja.



Udruženje građana "C.E.Z.A.R." Srbac

Zdravka Čelara 29, 78420 Srbac

Tel: 051 928 126

e-mail: zdravosrbac@yahoo.com

Konverzacijski kurs engleskog jezika



U okviru UG „C.E.Z.A.R.“ pokrenuta je nova aktivnost. U pitanju je Konverzacijski kurs engleskog jezika za sve iznad 14 godina. Voditelj aktivnosti je volonterka udruženja Anamaria Ljubojević (položen C1 nivo). Kurs se održava dva puta sedmično, svakog ponedjeljka i četvrtka.

Humanitarna akcija "Budi mi prijatelj"

Završena je humanitarna akcija „Budi mi prijatelj“, u sklopu koje se prikupljaju sredstva za kupovinu školskog pribora učenicima iz socijalno-ugroženih porodica povodom početka nove školske godine. Teglice-kasice su bile postavljene na 45 lokacija, a donacije su mogle da se ubacuju dva mjeseca.

Sva mjesta na kojima su teglice-kasice postavljene su obišćena i fotografisana, te promovisana na društvenim mrežama kako bi građani Srpcia znali gdje je moguće ostaviti donacije. Dvije teglice-kasice su napunjene i zamijenjene, u pekari Sunce i marketu ADS. Skupljen je novac za pripremu 100 paketa, što je najviše otkad Udruženje građana „C.E.Z.A.R.“ organizuje akciju. U pripremi, kao i prilikom podjele paketa volonteri su dali veliki doprinos



Projekat "Napravi pokret"

UG „C.E.Z.A.R.“ uzelo je učešće u projektu „Napravi pokret“ koji obuhvata pet modula. Mreža M.O.C.A.R.T. Republike Srpske u partnerstvu sa Institutom Perpetuum Mobile održala je prvi modul u sklopu projekta „Napravi pokret“ koji je podržan u okviru projekta „Stvaranje povoljnijeg okruženja za civilno društvo – EMBRACE“ koji finansira Vlada Kraljevine Norveške, a implementira Razvojni program

Ujedinjenih Nacija (UNDP). Prvi modul je realizovan od 23.-25. jula 2020. godine u hotelu „San“ u Laktašima, a podrazumijevao je obuku iz projektnog menadžmenta. Ispred UG „C.E.Z.A.R.“ modulu su prisustvovala izvršni direktor Tanja Šnjegota i omladinski radnik Jovana Janković.



Projekat “Kad slike govore više od riječi”

Članovi UG „C.E.Z.A.R.“ su učesnici projekta „Kad slike govore više od riječi“ u organizaciji Udruženja „Most“ iz Gradiške, a u saradnji sa Međunarodnom organizacijom za migracije (IOM). Edukacije se održavaju na četiri teme: baštovanstvo, emocionalna pismenost, ekološka svijest i zaštita životne sredine i ilustrativna tipografija. Edukacije će biti održane od 26. jula do 26. septembra, a kursevi su namijenjeni mladim ljudima od 15 do 30 godina. U pitanju je rad preko aplikacije „Zoom“.

Mladi daju znak, vrijeme je za park

Udruženje građana „C.E.Z.A.R.“ je obilježilo Međunarodni dan mladih početkom radnih akcija u parkovima. Iskrčen je teren, ofarban namještaj od paleta i klupice, a uskoro stižu novi elementi za dječije igralište.

Prva akcija restaruracije omladinskog parka je realizovana u sklopu projekta „Formiraj lanac“, a koji finansira Volonterski servis Republike Srpske u saradnji sa Ministarstvom porodice, omladine i sporta Republike Srpske.

U gradski park je postavljena nova igraonica u vidu kućice za najmlađe sa toboganom i ljuljaškom koji je finansirala Opštinska uprava Srbac, a na daljem uređenju će raditi zajedno sa UG „C.E.Z.A.R.“. Na obe lokacije je postavljen video nadzor.



Natpis „Ja volim Srbac“

Udruženje građana „C.E.Z.A.R.“ je postavilo 3D natpis „Ja volim Srbac“ ispred zgrade Opštinske uprave čime je u značajnoj mjeri uljepšan gradski trg i omogućena veća turistička prepoznatljivost opštine Srbac. U pitanju je projekat „Volim Srbac“ koji je podržan od Fondacije Mozaik kroz kampanju Omladinske banke Bosne i Hercegovine.

Kampanja ima za cilj da se utiče na razvoj turizma i da se privuku turisti koji će se fotografisati pored ovog natpisa prilikom posjete opštini Srbac.



Udruženje „Centar za poljoprivredni inženjering i marketing“

Ulica Majnska 50, 75203 Šićki Brod – Tuzla

Tel. +387 61 041 024

E-mail: udruzenjecpim@gmail.com

FB: @cpim INST: @udruzenje.cpim

Udruženje „Centar za poljoprivredni inženjering i marketing“ CPIM osnovano je u februaru ove godine i trenutno provodi projekat pod nazivom „Plodovi znanja i plodovi branja“ kojeg finansira Fondacija tuzlanske zajednice. Udruženje ima za cilj povezivanje studenata poljoprivrede sa firmama u kojima mogu volontirati tokom studija, sticati iskustva, te primijeniti ono što uče na fakultetu.



U okviru projekta „Plodovi znanja i plodovi branja“ za studente su planirane edukativne terenske posjete poljoprivrednim firmama na području Tuzlanskog kantona. U mjesecu julu počeli smo sa realizacijom naših edukativnih terenskih posjeta. Prva posjeta održana je 14.07.2020. god. na parcelama PZ „Agropromet“ Simin Han, gdje su studenti imali priliku da prođu kroz način proizvodnje kukuruza, krompira i paprike na otvorenom polju, te proizvodnje organski uzgojene maline.

Druga posjeta održana je 28.07.2020. godine, a obišli smo dvije firme, i to Bingo doo, te Plant doo. Firma Bingo doo na području Grada Živinice (Ciljuge) ima zasnovanu plasteničku proizvodnju krastavca, paprike i paradajza, i raspolaže sa 58 plastenika. Radi se o velikoj proizvodnji koja je jedna od rijetkih na području BiH.



Firma Plant doo Tuzla, na području Grada Živinice, u zakupu ima parcelu površine preko 30 ha na kojoj uzgaja BEZ GMO soju i jagode na otvorenom polju. Soja je biljna kultura koja se ne uzgaja često, te je ovo bila idealna prilika da se studenti susretnu sa njom i zainteresuju se za proizvodnju istu.

Možemo reći da je ovaj mjesec za Udruženje CPIM bio jako produktivan i mi se radujemo našim narednim aktivnostima koje možete pratiti preko Facebook stranice @cpim i Instagram profila @udruzenje.cpim

Za august je planiran nastavak realizacije projekta „Plodovi znanja i plodovi branja“.

Koordinator projekta je Mujić Adela.

INFORMACIJE / DONATORI / POZIVI

KATALIZATOR! – Otvoren poziv za prijave na online startup program



Ukoliko ste tim koji razvija tehnološku ideju ovu je prilika za Vas!

START Centar iz Banjaluke je danas otvorio poziv za učešće na KATALIZATOR programu. KATALIZATOR predstavlja intenzivni dvomjesečni program namjenjen timovima iz Bosne i Hercegovine koji imaju tehnološku ideju u ranoj fazi razvoja.

Timovi će kroz program proći proces izrade poslovnog modela, ispitivanja tržišta,

intervjuisanja, eksperimentisanja, validacije ideje i tehničke izrade minimalno održivog proizvoda. Sve ovo naravno pod budnim okom predavača i mentora.

Timovima je na raspolaganju:

EDUKACIJA

Serija vebinara koji će obrađivati teme Lean Startup metodologije, razvoja poslovnog modela, Customer Development-a, razvoja minimalno održivog proizvoda i prezentacionih vještina.

Proces razvoja poslovnog modela kao i cijeli *customer development* proces biće praćen 1 na 1 mentorstvom gdje će se timovi imati podršku od strane ljudi koji su razvijali svoje startape, podizali investicije, prodavali startape, ljudi koji aktivno investiraju i mentorišu.

TEHNIČKO MENTORSTVO

Tokom procesa razvoja minimalno održivog proizvoda timovima će biti na raspolaganju i mentori fokusirani na tehničke aspekte razvoja. Oni će učesnicima pokazati kako da uz minimum utrošenog vremena naprave funkcionalan MVP.

Na kraju programa timovi će imati priliku da svoje ideje i rješenja prezentuju predstavnicima pet regionalnih fondova koji investiraju u startape.

Rok za prijavu za učešće u program je 21.09.2020. godine

Realizaciju KATALIZATOR programa podržavaju Swiss Entrepreneurship Program, Virtuo, JS Guru, Startup Grind Sarajevo, AE Ventures, South Central Ventures, Fil Rouge Capital, ICT Hub Ventures, Vitosha Venture Partners i Vestbee platforma.

Više o samom KATALIZATOR programu, kao i formu za prijavu, možete pronaći na sajtu www.starter.ba

Grantovi Vlade Japana

Vlada Japana je prvi put 1989. godine pokrenula program pomoći pod nazivom "Grass Roots Projects (GAGP)", temeljni projekti, kao dodatak Generalnom programu pomoći vlade Japana. Od 1996 godine preko 180 projekta u ukupnom iznosu od cca. 10 miliona EUR / 19 miliona KM je implementirano u Bosni i Hercegovini u okviru GAGP programa.

Iako obje sheme imaju za cilj pružanje pomoći zemljama u razvoju u namjeri da im pomogne da zadovolje osnovne ljudske potrebe i riješe socijalno-ekonomske izazove, GAGP je fokusiran na podršku lokalnim zajednicama, odnosno direktno stanovništvu.

U okviru GAGP grantovi se dodjeljuju javnim institucijama (općinama i općinskim javnim poduzećima), osnovnim školama, domovima zdravlja ili organizacijama civilnog društva koje sprovode relativno male projekte.

Prioriteti

Unutar programa GAGP Japan podržava širok spektar projekata koji se baziraju na osnovne ljudske potrebe, kao i koji se baziraju na sigurnost. U Bosni i Hercegovini većina projekata koji se implementiraju unutar GAGP spada u sljedeće kategorije:

- Pomoć aktivnostima za deminiranje
- Javno zdravstvo
- Obrazovanje
- Socijalna zaštita
- Ruralni razvoj

Aplikanti

Prihvatljivi aplikanti su: javne institucije (općine i općinska javna poduzeća), osnovne škole, domovi zdravlja i lokalne i međunarodne organizacije civilnog društva

Neprihvatljivi aplikanti su: fizička lica, organizacije centralne vlasti (prihvatljivi samo u izuzetnim slučajevima) obdaništa, istraživački instituti, institucije višeg obrazovanja, bolnice, političke organizacije, vjerske ustanove.

Grant

GAGP finansira izgradnju i/ili nabavku opreme i/ili materijala. Svi predloženi materijali, oprema i usluge, treba da budu nabavljeni od domaćih dobavljača.

Grantovi isključivo pokrivaju troškove nabavke robe/usluga bez PDV-a.

Administrativni i operativni troškovi nisu prihvatljivi.

Maksimalan iznos raspoloživih sredstava po projektu je 10 miliona JPY (približno 80,000.00 EUR-a ili 156,000.00 KM), osim za projekte pomoći aktivnostima za deminiranje gdje maksimalan iznos granta može biti veći od 10 miliona JPY.

GAGP neće pružiti finansijsku potporu za projekte kao što su kulturno sportski događaji, aktivnosti vezane za biznis, niti za aktivnosti koje se odnose na religiju.

Podnošenje aplikacije i procedure koje treba da se slijede

1. Dostava aplikacije

Aplikacija se ispunjava na lokalnom ili engleskom jeziku, te dostavlja putem pošte na adresu ambasade: Bistrik 9, 71 0000 Sarajevo. Aplikacija se može dostaviti tokom cijele godine.

2. Provjera i odobravanje

Po primitku aplikacije, Ambasada Japana provjerava cilj, troškove i očekivani socijalno-ekonomski pozitivni uticaj projekta. Za sve projekte koji su uzeti u razmatranje Ambasada će napraviti pre-selekciju onih projekata koji odgovaraju ciljevima GAGP i osoblje Ambasade će upriličiti posjetu potencijalnom projekt području. Ambasada će ih predložiti Ministarstvu inostranih poslova Japana koje je krajnja institucija koja odobrava projekte.

3. Grant Contract (G/C) – Grant ugovor

Po konačnom odobrenju, ambasada Japana i organizacija koja prima pomoć će zaključiti ugovor (G/C) koji uključuje naziv, cilj i sadržaj projekta, naziv organizacije primaoca pomoći, visinu iznosa koji će biti obezbjeđen putem GAGP i stavke o ispravnom utrošku sredstava.

4. Trošenje sredstava

Nakon toga, korisnik granta će zaključiti ugovor o nabavci (P/C) za robu i/ili usluge sa dobavljačem. Ambasada će pregledati P/C (ili dokaz/predračun) da bi ustanovila da li je ista odgovarajuća.

U načelu trajanje projekta (vrijeme neophodno za nabavku robe i /ili usluga) bi trebalo biti do jedne godine dana.

5. Izvještavanje

Ambasada će tražiti od primaoca GAGP granta da pripremi i dostavi izvještaj o stanju projekta i to dva puta ukoliko se radi o standardnom projektu, a ukoliko je obim projekta veći broj traženih izvještaja će biti veći. Osoblje Ambasade može posjetiti mjesto projekta da bi se uvjerilo da se sredstva koriste za namjenu za koju su odobrena.

Više informacija: <http://www.bosnia.emb-japan.go.jp/BHS/EconomicGAGP.html>



Poziv za podnošenje prijedloga: „Jačanje regionalne saradnje na promociji građanskog prostora u zemljama Zapadnog Balkana“

Opšti cilj predmetnog poziva je podrška regionalnim mrežama i inicijativama na Zapadnom Balkanu finansiranjem projekata koji doprinose većem učešću i jačanju regionalne saradnje između organizacija civilnog društva (OCD) u promociji građanskog prostora.

Specifični ciljevi:

S.C.1- Stvaranje povoljnijeg okruženja za razvoj civilnog društva;
S.C.2-Povećanje transparentnosti i odgovornosti u radu organizacija civilnog društva.

Na predmetni poziv mogu se prijaviti regionalne mreže organizacija civilnog društva registrovane u jednoj od zemalja Zapadnog Balkana.

Veličina granta za koji potencijalni aplikanti mogu aplicirati iznosi:

- Specifični cilj 1: minimalno 30.000 eura, maksimalno 70.000 eura (uključujući i troškove audita),
- Specifični cilj 2: minimalno 20.000 eura, maksimalno 40.000 eura (uključujući i troškove audita).

Sufinansiranje od strane aplikanta se **ne zahtjeva** u okviru ovog poziva. Donator pokriva cjelokupan iznos troškova projekta.

Rok za dostavljanje prijave je **15. septembar 2020.** godine do 24:00 časa.

„Smjernice za aplikante“ možete pogledati i preuzeti [OVDJE](#).

Više informacija o Pozivu možete pogledati [OVDJE](#).



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

**Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

*Urednik Biltena:
Mirela Biković*

*Prevod Biltena na engleski:**Alma
Ahmedbegović***

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*